

Dumonda Ruckstuhl concernent la concessiun da dretgs politics a personas sut curatella cumplexsiva

Ils 29 da november 2020 han las votantas ed ils votants da Genevra ditg cleramain «gea» a la concessiun da dretgs politics a var 1200 personas sut curatella cumplexsiva.

Uschia è Genevra l'emprim dals 26 chantuns svizzers, en il qual personas dastgan votar ed eleger independentamain da lur impediment spiertal u psychic. Latiers tutga er il dretg d'eleger passiv: En il chantun pon pia er personas cun impediments vegnir elegidas en uffizis publics.

Cun quest cler verdict è Genevra er l'unic chantun svizzer che respecta il dretg internaziunal davart las personas cun impediments; l'exclusiun actuala sin plaun chantunal e federal cuntrafa numnadamain a la Convenziun da la ONU davart ils dretgs da personas cun impediments, da la quala la Svizra fa part dapi l'onn 2014. La cumissiun da la ONU ch'è responsabla per realisar la convenziun na permetta naginas restricziuns dals dretgs politics. A questa cumissiun appartegna dal rest er in represchentant da la Svizra: Markus Schefer, professer da dretg public a Basilea.

Las sutsegnadras ed ils sutsegnaders tschentan las suandantas dumondas en quest connex:

1. Tge geners da curatella datti, co èn els caracterisads e quantas personas en il chantun Grischun (personas creschidas, uffants) èn sut curatella? Quantas personas en ils differents geners da curatella n'han nagins dretgs politics?
2. Figurescha la Convenziun da la ONU davart ils dretgs da personas cun impediments sin l'agenda da la Regenza per megliarar ils dretgs politics da personas cun impediments?
3. Existan en il chantun Grischun ulteriurs temas che vegnan realisads en il rom da la Convenziun da la ONU davart ils dretgs da personas cun impediments?
4. È la Confederaziun gia intervegnida ed ha ella pretendì da realisar la Convenziun da la ONU davart ils dretgs da personas cun impediments? Tge barat exista tranter las regenzas chantunalas pertutgant quest tema?

Tavau, ils 9 da december 2020

Ruckstuhl, Hitz-Rusch, Tomaschett (Caira), Atanes, Baselgia-Brunner, Berther, Bettinaglio, Brunold, Cahenzli-Philipp, Cantieni, Casutt-Derungs, Caviezel (Caira), Cramer, Danuser, Degiacomi, Deplazes (Rabius), Derungs, Epp, Florin-Caluori, Flütsch, Gasser, Hofmann, Holzinger-Loretz, Kohler, Kunfermann, Loepfe, Maissen, Märchy-Caduff, Müller (Favugn), Niggli-Mathis (Grüsch), Paterlini, Preisig, Sax, Schmid, Schneider, Schwärzel, Tomaschett-Berther (Trun), Widmer (Favugn), Wilhelm, Bürgi-Büchel, Gaupp, Giudicetti, Pajic, Spreiter, Stieger, Tomaschett (Caira)